

嘉慶松江府志

松江府志卷五十六

古今人傳八

國朝

張安茂字子美青浦人以誠第三子順治四年進士授工部主事戊子分校北闕所得皆知名士鍾陵熊伯龍與焉出管清江牘尋兼七省漕儲時漕政積敝軍弁互爲奸利安茂悉裁一切陋規八年春兼理鹽政晉工部員外郎陞浙江按察司僉事提督學政與諸生約法六條刻先正大家文頒爲程式轉陝西布政司參議絳吏議事自授西寧道夷民畏懷康熙四年致仕歸里以湖

濱漁蕩捐青浦縣學官安茂侗儻有才略詞藻絕工下
筆數千言又能馬上擊劍彎弧稱文武才嘗慨學宮禮
制未備親爲考訂凡儀尊簫舞釋菜登降之儀繪圖刻
成名曰判宮禮學全書卒年六十二

魯志參妻
志青浦志

宋徵輿字轅文華亭人順治四年進士授刑部江西司
主事晉員外郎中出爲福建布政使右參議兼按察司
僉事提督學政內擢尙寶卿歷宗人府府丞以之晉左
副都御史卒年五十徵輿稱雅才工詩賦與同里陳子
龍李雯稱雲閒三子子龍負盛名於時稱詩無所讓獨
推重徵輿以爲出己上嘗共選明詩行世學者宗之著

有林屋詩鈔祭酒吳偉業爲之序予祖年負雋譽蚤卒

奉賢

志

曹垂璨字天琪上海人順治四年進士出宰藁城遂安
有惠政歸田後手不釋卷癸巳海島張名振犯上海總
兵王某謂邑中通寇禍且不測垂璨率諸紳士請於撫
軍願以百口保良善合邑賴之康熙癸亥與修邑志著
有明志堂全集

上海志

諸舜發字元升青浦人順治四年進士授戶部主事董
蘆政以廉幹聞擢陝西提學僉事以疾卒於綏德州署

青浦

志

徐鼎字子久華亭人順治四年進士授麻城令時姜瓖
金聲桓竝反全楚震動奸民乘機倡亂攻麻城鼎授兵
登陴城中多僧道上官疑其通賊令除之鼎力爭不可
卽用以守僧道感奮用命晝夜徼循屢攻屢卻是時黃
屬五城皆陷而麻城獨存鼎之力也方擬卓薦尋以支
庫銀充餉降級調用遂不復出

奉賢志

田茂遇字樞公青浦人順治五年舉人授新城令不赴
後以博學鴻儒徵不遇歸茂遇少游夏瑗公之門詩文
爲當世所重有俠槩重聲氣同郡顧開雍游雍坐病失
期有司卻其藉因留燕市茂遇聞之單騎走淮上請於

學使者言開雍實病狀得給書專請齋糧往返不遠千里人高其義晚年移居泃濱訪趙松雪楊鐵崖故址築水西草堂日與名流飲酒賦詩猶見前輩高致著有大雅堂集水西四十九種行世

青浦志
參魯志

周茂源字宿來華亭人順治六年進士授刑部主事轉郎中卹刑河南平反冤獄以千計出爲處州府知府郡在萬山之中徑路險隘諸亡命深匿兵騎不能入茂源募民開鑿自括蒼至東甌計三百五十餘里悉成坦塗時戶口彫劫茂源招集流移人給牛種墾田一千八百頃有奇寇入縉雲率鄉兵千餘奮擊賊宵遁十五年海

踪犯甌率兵固守青田賊不能犯後以逋賦牽連罷歸年六十卒茂源在幾社中與其姪立勳竝負重望爲文沈博絕麗詩詞清逸有大歷之風著有鶴靜堂文集奉賢

志參浙
江通志

袁國梓字丹叔華亭人順治六年進士授刑部主事陞員外郎中出知衢州府時劇盜林文等嘯聚山谷上官命督兵剿之殲其魁餘黨悉就撫尋以母老乞歸母亡服闋補平陽府知府國梓勤於吏治文書片語裁決胥中肯綮勘出絳州無產之稅申請豁免代償太平令何煒然逋欠庫銀平反鄉寧諸生任宏贊一案開釋大辟

與甚衆曾以事解任起補嘉興府知府甫下車卽捐俸
修輯府志時有纂修

大清一統志之役上官檄府州縣各以其志上之部限急
迫而嘉興應之獨早上官嘉歎焉以疾卒於任

華亭志
參山西

通志

許纘曾字孝修婁縣人樂善曾孫順治六年進士由庶
吉士遷中允以才堪外任轉江西驛鹽道理郵政除饑
蠹商民便之改川東道時寇孽未殄從征萬川及取大
昌皆有功擢河南按察使以事罷起復補雲南按察使
乞終養歸著有寶綸堂集

婁志

王廣心字伊人華亭人嗣響曾孫也方總卯卽發憤讀書經史之學靡弗貫穿夏考功允彝賞其文曰鉅麗絕代吾不及也順治六年成進士授行人遷兵部武選司主事授御史纂巡視京東二倉漕政自明季以來吏役窟穴其中浮冒侵欺之弊積久難除廣心上言水次多一人則地方多一需索交納多一役則丁弁多一打點使嚴行裁汰

朝廷歲省俸薪工食以萬計南北軍民歲省勒詐侵漁不知幾十萬也前後條奏不下三十餘疏由是蠹弊肅清運弁皆有餘羨以完積空又修築通會河運道輸輓無

阻以親老乞歸卒年八十一累贈大學士光祿大夫崇

祀鄉賢

華亭志

陸振芬字令遠青浦人少與兄振英俱知名振英由拔貢生官英德縣知縣振芬順治六年進士時兩粵未定破格用才擢授廣東惠潮道僉事隨大軍進討諸郡邑以次削平抵任後招流亡省徭役民大和癸巳四月潮州總兵郝尙久作亂圍道署振芬密遣家人齎蠟丸請兵剿賊尙久伏誅尋引疾歸卒

妻志

朱紹鳳字儀聖上海人父雲昇純謹篤實紹鳳成順治六年進士除山西臨縣擢授吏科給事中再遷禮科都

給事時江南漕事大壞初按臣秦世禎題請官收官兌
每糧百石加米五石銀五兩以爲兌軍之費其後遂成
虛設民間所費百石至數十金紹鳳上疏極言其弊請
申明舊制而於五兩之外復加五兩著爲定例此外軍
有勒索官有增科皆以三尺從事勿貸會御史馬騰陞
亦力爲振刷得

旨允行又定主將連坐之法以肅軍政請復兩試以宏樂
育所言皆關政體十六年會推總漕某紹鳳昌言不可
又上疏言周亮工保障閩疆有功案宜速結謫建寧司
獄又以他案被誣見逮比得白尋卒有疏稿浣花窩詩

集

南雁志

王鏗字錢壽華亭人通籍後復姓何順治六年進士知
雩都縣時峒寇跳梁鏗撫馭有方民無兵擾捐俸修
文廟學使者趙函乙撰記勒石丁母憂服闋補博興涖
任三日適小清河決鳩工埽築七日而隄工竣田廬無
恙是年分校秋闈以事註誤回籍康熙十四年有
旨開復以親老辭年七十四卒

沈荃字貞蕤華亭人青浦籍幼孤事母至孝順治九年
進士

賜第三人及第授 國史院編修出爲河南按察副使是

時羣盜董添祿牛光天聚衆千餘鈔略許潁閒勢張甚
荃整卒伍懸購賞嚴軍令遣中軍王福爲前鋒而身督
勁兵繼之殲其渠餘賊解散禹州多盜荃遣吏卒收捕
悉按誅之以監司入

覲疏稱彰德養馬病民及禹州糧應分上下等皆中利弊
得

旨報可康熙元年丁憂服除補通薊道以事註謫寧波
同知未赴任

召見特旨復正四品仍入翰林補侍講十一年典試兩浙
未還轉侍讀擢國子監祭酒晉詹事加禮部侍郎疏言

青宮在豫養并霍韜聖功十三圖進之未幾復疏列出
閤四事皆報聞故事詹事得與會議荃於民生利弊時
政得失剴切詳言略無瞻徇十八年旱

詔求直言時定新例當流者徙烏喇極北以實邊廷臣集
議荃謂烏喇距蒙古三四千里地不毛極寒牛羊橐駝
凍輒死罪不至死者不應驅之死地爲議上之

詔令畫一荃堅持前議曰此議行三日不雨臣願受欺罔
罪

上改容納之越二日大雨盈尺例竟罷荃在大梁修河南
通志旣成上之後十餘年

詔天下郡縣修志一以河南爲法康熙二十三年卒年六十一諡文恪荃以書名海內被

聖祖仁皇帝特達之遇殿庭屏障以及

御座箴銘皆屬荃書著有充齋集

青浦志

李榛字素心華亭人父沾官左都御史榛幼聰穎異常兒弱冠舉於鄉嘗從父官閩中有投牒欲糴米鄰邑者沾許給照榛持不可曰此奸民欲通番者得照則公然爲矣沾不聽索印印照榛匿其印沾怒然事卒不行未幾而他邑有通番事敗者令以給牒被議人服其識願治九年成進士

殿試二甲第一授吏部主事以僉事督學河南試汝寧一
縣令欲有所關說懷金以進憐拒之嘗於同官處見某
生文驚曰有此才何試時未見邪答曰此生丁艱今歲
場期不能及矣憐詢其服闋之期曰八月初七憐曰可
語之令其初五六至省我必送之入闈已而入試遂連
捷丁內艱服闋補湖廣上江防道駐岳州始至城中僅
茅屋數椽居月餘登樓見有造瓦房者憐色喜一日有
於文廟後挖土者諸生訟之則卽瓦房中人也憐曰今
此呈一下府府行縣縣則委衙勘覆事止不應結案而
瓦房將不保矣乃出一示自後不許於文廟取土而其

事遂竟他愛士惜民類如此以疾卒於官

魯志

顧大申字震雉華亭人初名鏞順治九年進士授工部主事督江寧蘆政分司夏鎮河道夏鎮無城郭大申用公費爲檠築之需不事科斂城成屹然爲鎮永利建兩湖書院捐俸延師弦誦日廣十六年己亥海寇犯金陵大兵南下自德州東昌以南率夫挽至董家口始釋時值水荒人煙斷絕餓莩無算大申捐俸每三十人給一舟并路費所活數千人以奏銷案註誤左遷順天府通判丁內艱服闋上書自理

詔復其官庚戌吳越水災大申言宜濬三江故道條爲十

二則後濬婁江吳松江皆用其議癸丑出爲陝西洮岷道僉事卒於官著鶴巢詩河渠書十八卷畫塵八卷子

輔之中書舍人

學志

施維翰字及甫上海人順治九年進士除臨江推官擢兵部主事歷官御史前後章奏如復耕籍減浮糧緩開徵定編審除塘長曠工禁漕米耗羨懲監司之貪嚴大帥之縱簡投誠之兵伸言路之氣飭官吏侵牟戒營弁羅織皆關大體多議行康熙八年掌京畿道請減蘇松浮糧劾偏沅撫周召南閩督劉斗浙撫陳秉直罷之爲副都御史請嚴督撫薦舉非入照例實降不准抵銷十

八年巡撫山東黜貪墨輯悍兵勸墾闢禁耗羨歲饑親行所屬設法賑濟疏留漕米五萬石全活無算舉廉吏陳文學周根邵等俱擢臺諫案牘皆親自裁決不假他手二十一年總督浙江前督參滿軍鼓譟事株繫二百餘人維翰至卽日會讞多平反明年調任福建總督踰嶺而卒

予祭葬

賜諡清惠宗祀鄉賢竝建特祠

上海志參朱德宜撰墓志

李延渠字方思華亭人順治九年進士授南寧府推官用法稱平以奏銷案註誤降香山縣丞香山官吏多受

海舶賄賂事發盡罷斥獨延渠留屢攝縣篆不受請託
不名一錢以疾卒於官

奉賢志

曹爾堪字子顧婁縣人嘉善籍勳子順治九年進士選
庶吉士博覽強記能舉原委輿圖要害山川形勢指畫
纖悉聽者神聳歷陞侍講學士屢蒙

聖祖仁皇帝嘉寵有學問最優之語罷歸偕二三老友選
勝賦詩與宋琬施閏章王士正王士禛汪琬程可則同
郡沈荃稱海內八家有南溪集行世子鑑平鑑臨有傳

橋李詩繫參
嘉善志

張淵懿字硯銘華亭人順治十一年順天舉人以奏銷

案黜與田茂遇馬个臣輩爲忘形交著有臨流詩雒鵲

初集

青浦志參
松江詩鈔

陶憐字冰修華亭人嘉善籍順治十一年舉人官天台
教諭卒於任性傲岸後學日進彌自謙挹其在里中倡
興詩會刊有棠溪詩選行世兄監之字聖從與憐齊名

先憐卒

董含感
舊集

王日藻字印周華亭人陞孫幼孤母徐撫育之順治十
二年成進士授工部主事出掌江寧蘆政分司呂梁自
彭城下至安東河流效順報最速員外郎陞郎中尋爲
江西提學僉事丁內艱服闋補河南河道以轉餉功陞

浙江按察使旋擢江西布政使晉副都御史巡撫河南
先後上疏論改折捐糧賑飢平獄定鹽引免堡課諸事
皆一一施行又請墾荒田四十四萬餘頃悉成沃壤至
今賴之旋擢刑戶兩部侍郎拜工部尙書遷戶部充纂
修賦役全書總裁以事落職康熙三十八年

上南巡召見勞問

賜御書褒賞有加旋以永定河工起用卒於工所

詔復原秩

妻志

張錫懌字越九上海人元玘孫順治十二年進士授泰
安州牧州有捨身崖愚民惑所謂報孃恩者往往投其

中甫視事卽禁止廣學舍減香稅清逃人復四氏學會
分校秋闈被議歸癸巳海警或倡游言闔邑將罹不測
以錫懌抗辨得免語在曹垂璫傳中康熙七年議塞界
河三處防海覃及支河錫懌力言其害川沙南匯歲派
修城費鉅民苦之廉知營戍爲奸利白當事免之疾革
故人大名推宮陳朗哭曰吾貧賴子以活子死誰殯我
者卽命孫家爽出篋中金贈之詩詞爲當世所重家爽
字荀六康熙乙酉副榜官蕭縣教諭以植行聞

上海志

陸鳴珂字曾庵上海人起鳳子順治十二年進士初任
揚州教授以奏銷罷起補常州疾交游聲氣訓士以器

識爲先轉國子監監丞累遷至戶部郎中一典四川鄉
試三充會試同考官出爲山東按察司僉事提督學道
均稱得士分修高堰河工踰年以布政司參議致仕鳴
珂天分過人屬文不立草性恬淡與物無所爭弟鳴球
字文中尤以儒宗自任闢二氏甚力博辨宏偉日事編
纂有所感發一寄之於詩平生以存孤植寡爲志嘗有
句云欲了一生難了事先完三族未完姻與鳴珂稱二

難云

陸氏
家傳

夏長泰字季保華亭人父嘉遇前有傳長泰順治十二
年進士授文水令輕刑緩徵得士民心擢刑部主事請

假歸布素蕭然會蘇松撫臣議築隄捍海推長泰廉幹
請視工事以勞瘁卒

嘉善
楊志

張有光字星燦青浦人父驍以恩貢授新寧令不赴卒
有光苦志力學順治十二年成進士授工部營繕司主
事時崇建

奉先殿有光爲監督朝夕虔謹工匠中老弱羸病悉放還
工食親自給發

告祀禮成

賜緞馬獎勵有加出推荊州鈔關商船隨到隨報令自填
流水簿以絕包攬壅滯之弊陞都水司員外郎授山東

南旺河道以奏銷案鐫秩歸徜徉山水二十餘年卒年

七十五

青浦志

王之明字敬章本姓程青浦人順治十二年成進士選縣令不赴十七年任安慶府教授卒於官之明家極貧弱冠卽爲童子師時值兵火後人多廢學之明獨刻意攻苦爲文自成一家

張一鵠字友鴻歙縣人居朱涇順治十五年進士授雲南推官有治績歸後建宗祠教子弟以品學重詩文雄深壯健有磨盾橫槊之風與新城王阮亭中州彭而述倡和尤工山水得宋元人筆意子起麟自有傳

金山志參帶經

室集

朱錦字天襄上海人居周浦永泰孫順治十六年會元
選庶吉士爲諸生時以文章雄視儕偶辛丑充禮闈同
考得人最盛旋以母老乞歸初錦公車將北上里中貧
民有鬻其未婚婦於妓家者錦急贈金贖之或謂如資
斧何錦曰我行可少緩此女一去卽墮落矣生平談於
進取而砥礪名節遠近宗仰著有藜照堂集卒年五十
四弟鐸字拂鐘資敏尤邃於古喜賓客好吟詠先錦卒
上海志

董含字閎石華亭人順治十八年進士少好學至忘寢

食比長有文名嘗與海內名流扁舟車笠往來吳山越
水閒觀政吏部以奏銷案被黜益放情詩酒著有古樂
府閔離草閒居稿弟俞字蒼水十七年舉人詩文與含
齋名時稱二董嘗薦舉博學鴻儒不遇著有樗亭稿俞
子溶字晴川諸生有才名早卒

松江詩鈔

宋慶遠字源餘婁縣人順治十八年進士授大理寺評
事未第時嘗偕同人結振幾振雅二社詩文爲一時之
冠後以奏銷案落職康熙四十九年

特恩復原官時年七十四越明年卒

婁志

王又汧字孝西婁縣人順治十八年進士授福建平和

令時海氛未靖縣在萬山中多盜又併嚴屯軍置守備

飭保甲盜不敢犯歷官德安府知府引疾歸

婁志

趙子瞻字半眉上海人幼孤有成人之量及長力學通經史旁及天文地理諸書順治十四年領鄉薦因主試被論戊戌己亥春兩蒙

世祖章皇帝臨軒覆試自制舉義外雜試詩賦論序表策頌記辨說數篇拔置上卷十八年成進士

殿試二甲四名例授推官坐公事免閉門課子以詩畫自

娛著有詩集四卷詞一卷行世

上海志

葉映榴字丙霞上海人有聲子順治十八年進士授庶

吉士轉禮部郎康熙十四年權贛關值吳逆亂守險要
撫流民虔南賴以保障二十四年授湖北糧道會裁總
督缺并裁督標兵楚兵素剽悍有夏逢龍者尤桀黠軍
中號爲夏包子衆推奉之裁檄下兵卒洶洶無所歸向
求巡撫給月糧不得遂聚謀山中將爲亂武昌同知某
倡議捕賊衆愈怒露刃入轅門映榴急入請好言撫之
巡撫出衆不遜詈曰若欲反邪衆噉然曰反耳柰何逐
巡撫撫逸去映榴冒刃前諭以朝廷威德不應擁歸逼
從瞋目叱之欲奪刀自刎賊大呼曰殺好官不祥以兵
環之巡撫旣遁餘或亡或降賊勢大振映榴困孤城中

誓一死念老母無所託顧其妻陳淑人曰以付若遂令
陳奉母易服從水關遁出曰我乃今可以死矣卽縊遺
疏北向九叩南向再拜升公座罵賊自刎瞋目良久然
後瞑賊大驚羅拜而去疏聞

上震悼贈工部右侍郎

予祭葬廕一子明年

南巡

御書忠節以諡之今祀忠義祠子勇孫鳳毛自有傳

上海

詳南
匯志

諸嗣郢字乾一青浦人師事徐方廣受制舉業陳

董其昌見之目爲神駒順治十八年進士未

殿試逋糧案起被斥嗣郅秉尙幽貞夙有買山之願旣鋼
廢益耽泉石九峯閒各有營建歲以上巳重陽招賢士
大夫游且以祀張翰二陸顧野王張之象諸賢與其會
者人以爲登仙時陸振芬周茂源謝官歸皆築室山中
往來過訪觴詠無閒又嘗與昆山葉方藹善約共隱方
藹字子吉號訥庵嗣郅築吉亭訥齋以招之又緘寄當
歸以果其約康熙二十一年方藹卒於京師未幾嗣郅
亦沒年五十九嘗與嘉興父丹生撰九峯志未成修青
浦志復爲他人所亂

青浦志

李雯字舒章上海人逢申子爲諸生與陳子龍夏允彝齊名逢申死闕難雯在邸舍聞難絮血行乞朝夕哭不絕聲氣息奄然守父棺不他徙五月初一日

王師入京城內院諸大臣憐雯孝且奇其才薦授宏文院撰文中書舍人世傳

國初時高文典冊咸出其手乙酉充順天鄉試同考官丙戌請於

朝以父喪歸葬旋卒著有夢齋集五十二卷

妻志參修社事本末

張安豫字子建華亭人父以訥前有傳安豫明季由恩貢生遷齊河縣丞以平龍山賊有功擢齊河縣知縣遷

保定府同知時舉烽日近關城戒嚴安豫悉力固守薊遼經略王永吉知其才舉以自隨題授兵部職方司員外郎兼戶部事督理軍餉薊鎮兵譁安豫諭以大義咸搏顙歸伍

王師入關隨征殺賊二年乙酉

詔兵部尙書王鼇永招撫山東以安豫威信素著薦授清軍右布政兼理監軍事降人不法安豫誅首事者左遷金華府知府時婺城初下民情畔疑安豫設法招來戢暴兵嚴告訐蠲免力役民獲蘇息越明年歲大稔多方賑濟全活無算郡庠燬於兵鳩工重建通濟橋爲括蒼

太末孔道以兵燹廢修復之又造營房築石壩嚴保甲
備儲峙以濟征閩

大兵治行推第一擢分守嘉湖道失上官意絀吏議士民
倍道走三衢訟冤事白補長蘆鹽運分司以忤鹺使拂

袖歸卒年五十六

魯志參浙
江通志

宋徵璧字尙木華亭人懋澄子初在幾社中名存楠崇
禎十六年進士授中書充翰林院經筵展書官奉差督
催蘇松四府柴薪銀兩未復命以國變歸里入

國朝以薦授祕書院撰文中書舍人舟山之役從征有功
轉禮部祠祭司員外陞本部精膳司郎中出知潮州府

卒徵璧鴻才麗藻與從弟徵輿有大小宋之目當明崇禎時與宛平王崇簡諸人互相倡和同里夏允彝陳子龍竝重之著有抱真堂集吳祭酒偉業序之

奉賢志

莫琛字人玉華亭人天洪孫明諸生工詩善書尤明掌故徧游四方爲幕府司奏議延請無虛日然雅非其意洪經略特疏薦之固辭後以功貢官辰州府教授卒

世譜

張世榮字豈名婁縣人安恭子順治元年以諸生貢入太學授山東濟南府推官歷同知治中所至著稱擢兵馬司指揮遷刑部主事晉員外郎司秋讞多平反西曹倚以爲重轉戶部浙江司授山西布政司參議整飭雁

平道約己愛民革餽遺絕迎送持法詳慎爲守令先尋告歸卒

王鍾毅字遠生婁縣人幼爲徐比部鴻洲所器重妻以女孫未冠爲諸生餽於庠力求有用之學讀書敦行游其門者如張安茂起麟先後捷南宮而鍾毅屢薦不售晚以恩貢需次爲學官

婁志

陸璘字公敘華亭人應寅曾孫少與從子亮輔齊名亮輔成進士而璘兩中副榜訖不遇以貢選授廣東四會縣知縣四會依山阻水劇盜李春光等據爲巢穴統衆犯境璘乘其悉出遣土兵從閒道深入扼其背賊歸路

祀遂潰散未幾土寇羅勝統劫陽春新興兩縣庫走清遠縣之秦王山憑阻作亂白晝焚掠上官檄鎮將協勦以璘在四會有討賊功檄爲監軍鎮將用璘計平賊尋以奏銷一案罷官著有遺安堂集

奉賢志

喬世埴字子方上海人年十三補博士弟子員當湖呂濬襄陽方岳貢咸甄異之喜詩文好賓客在幾社中聲望蔚起九試不第卜築西郊名其園曰秋爽順治中由明經

廷對未授官卒著有玉版陽秋十卷燕喜堂稿紉蘭草行

世

上海志

沈紹賓字廷作華亭人學士粲九世孫由明經官青陽訓導博學工詩古文藏書五萬卷皆手自評閱青陽敦樸少文紹賓至期會講習士遂斐然向學年七十四卒著有月澗山房稿

金山志

周心杞字永瞻婁縣人順治十四年歲貢留心性命之學與平湖陸贈公交最厚清獻總角時永瞻知爲德器後以役累僑居嘉善邑人爭師事焉著四書斷清獻爲序讀易斷疑藏於家子梁字好生少穎異以五經補博士弟子員厲志學行與清獻往復辨難多所發明

金山志

吳定字澹庵上海人順治五年貢生除澄江令時邑盜

充斥積逋山積九年十易官定以德化民計擒賊首勸
農墾荒建水東書院延師課士攝韓城邵陽俱有惠政
在澄十一載遷行人四爲

詔使擢刑部主事校正律令出督夏鎮河道增築河隄三
百餘丈上官稱其廉幹假歸杜門著書周貧乏設義渡
人咸感之輯有河渠志子開封大理府同知子獻官知

縣

上海志

顧開雍字偉南婁縣人諸生順治八年貢入太學開雍
軀幹奇偉美鬚髯性和易詩文峭刻尤長五言古及漢
魏樂府在幾社中推祭酒同時諸名流以次登科第開

雍獨以文學終嘗一游燕市旋以病歸結廬谷水之陽

杜門卻掃著述自娛書法古勁爲時所重

婁志

杜登春字九高婁縣人青浦籍麟徵子順治八年選貢
由翰林院孔目授山西廣昌縣知縣縣舊例五年一審
丁官視爲利藪登春潔己從事民大悅陞浙江處州同
知卒於官登春少與夏存古徐度遠顧子韶王后張均
有聖童之目所著社事本末及江東耆舊傳均可備郡
中掌故兄同春字子曠甲春字端成並有聲幾社中

婁志

參漱芳齋詩話

王雲字勝時原名溥字大來婁縣人幼爲陳子龍弟子

處師生患難時卓然有東漢節義風以諸生貢入成均
不得志縱游齊梁楚粵晚歸老康園著有輞川稿子世
稷字有相以貢生爲安東訓導移字萼華諸生皆世其
學

婁志

閔峻字山紆其先烏程人十世祖遷居東海上遂爲荀
里望族峻少孤母徐教育之高才博學采秀無雙同郡
周立勲太倉張溥咸折輩行與交入

國朝以貢選授盧龍令廉明仁愛五年有十異政邑民樹
碑頌德擢職方司主事尋擢嶺南稅務以廉慎稱使還
便假歸里謝絕塵鞅不以片紙謁當事撫卹宗族並有

恩紀著有照海堂集兵法觀略東華集評選吳越二十家共若干卷行世卒年六十七子璐貢生瑋康熙乙卯

舉人

錄山堂集
參南匯志

張天培佚其字上海人順治八年恩貢選韓城縣丞康熙乙卯二月守將李師膺殺令翟世琪據城叛天培時解蜀餉歸聞變疾馳抵縣賊環刃脅之不屈以計給賊出城乘間請救兵至乃解韓人德之後遷平遠令其從父積祥字芥舟才氣恢詭著述甚富年八十餘卒瞿穀倬以詩曰雄視八十載著述誰云匹觀其搖筆時後進

皆惕息云

上海志

胡竹字椀珠華亭人與幾社諸人游有盛名中北閭副榜素業貞確以詩酒自娛古今體俱超出流輩與侍御王廣心爲文字交人謂其才品亦相埒云

金山志

茅起翔字旦弋金山衛人有聲幾社中與盧元昌等操選政者四十年一時知名之士羣相引重晚歲築奇松閣讀書以終其身當時文社中有茅沈胡盧之目沈謂子凡胡謂椀珠盧謂文子茅則旦弋也

金山衛志
參華亭志

宋弼字采臣華亭人居青村港高才宿學以歲貢生授高苑令縣多奸民爲地方害弼執其尤桀驁者杖殺之餘皆斂迹民貧逋賦纍纍敲扑至死不能償弼憫之捐

俸代逋檄攝益都復以最聞以憂歸弟際字我修
瀛其婦翁也工詩文孔上公署爲司樂與弟簡臣纂
里廣志以呈龔尙書芝麓尙書賞之志遂行世王光承
尤稱其詩

奉賢志

張世維字我持婁縣人安豫子嘗佐安豫平龍山賊隨
往山東招撫駐濟南時士大夫家屬及商賈集濟上不
得進退者數萬人且不得食世維急請檄衛遂率步騎
三百從賊中防護悉下淮泗齊魯間人奇之呼爲鐵膽
張公子後在京口王將軍之鼎幕府鄭成功入寇之鼎
賴其贊畫以勞得疾歸世維天性孝友赴義若熱工詩

古文詞以歲貢注選訓導年五十六卒弟士紳字臨武
初名世紳游北雍改今名順治十四年舉人倜儻負才
安豫守齊河士紳相隨捍禦入

國朝又佐其父監東省軍後屢擢春官需次知縣未及官

卒

東海家傳

張宸字青瑯上海人博學工詩文由諸生入太學選中
書舍人時

端敬皇后升遐

上命詞臣擬撰祭文三奏草而

上不懌最後屬宸有云渺茲五夜之箴永巷之聞何日去

吾十臣之佐邑姜之後誰人

上覽之泣然稱善尋遷兵部督捕主事康熙六年求直言
宸疏請撤本邑客兵二千四百人并巡海章京以蘇民
困邑用安堵旋罷歸病卒有蘆浦莊詩北征使粵草行
於世

上海志

沈沐字兩臣上海人順治十七年副榜窮經稽古後徒
自給其著錄弟子如朱鑑高廷亮趙炎輩百餘人多知
名士卒私謚貞素先生焦徵士袁熹贊其像曰貌之臞
神之腴文之富道之餘無營無欲乘太虛嗜義奮勇賁
育諸人世富貴浮雲如謚以貞素讓不誣

南匯志

楊王猶字成侯曼縣人歲貢生與兄桓互爲師友陳黃門夏考功俱器重之閉戶著述年八十一卒子斗芬字

南楚華亭廩生

金山志

張安泰字康侯婁縣人孝子以訥第三子善屬文中年以諸生入太學遂棄舉業刻意爲詩兼工山水築室皇甫林南曰鷄室內行純篤郡舉鄉飲賓次子世璘令關中就養官廨一年卽歸田母以晨昏累吏治或致簠簋不飭也世璘字孝節順治六年選貢授陝西靈臺縣治尙寬靜以廉節聞丁父憂歸不復出

王承庚字丕祐上海人居航頭由順治五年副榜授朝

邑令有惠政尋遷滄州知州性耿介不欺暗室事親色養兄弟白首怡怡沒祀鄉賢子輅歲貢生官望江縣教

論

上海志

彭賓字燕又華亭人前明崇禎庚午舉人入

國朝選授汝寧府推官爲周端臣屬吏仍以舊時名紙投之端臣怒因免歸賓在幾社中爲壬申文選六子之一杜方伯喬林延課其子騏徵駿徵晚歲授徒與門下講論文藝疊疊不倦猶見先正典型初賓祖汝讓居郡西金沙灘有春藻堂隆萬閒與同人結文會明季陳夏主盟風雅燕又與其兄彥昭卜居披雲門外濯錦巷仍移

舊額署之是爲幾社諸君子高會處子師度字古晉年
十五卽席成虎邱夜宴序吳梅村謂與吳兆騫陳維崧
爲江左三鳳云

松江詩鈔

顧其言字公綸上海人居所城前明崇禎進士知香山
縣署順德時流寇震韶連羣情扇亂賊駕百餘艘出入
香順閒鈔略其言謀知圍城期陰部署謂父老曰賊攻
城必先窺城窺城者某也出不意禽之賊不敢動矣某
蓋指大俠梁碩卿賊奉爲渠帥者也果就縛城下乃引
兵疾馳至古鎮民皆甲而出其言曰今所欲得者何禮
孟諸人也餘無恐民大喜釋戈縛其魁以獻復引兵趨

旗纛澳賊方聲援順德不虞卒至悉驚竄斬獲五百人
賊遂平是役也其言廉知賊姓名疏記之故就戮無一
枉者擢工科給事中以憂歸入

國朝薦補陝西布政司都事尋乞休卒年七十八

南匯志

朱在鎬字周望上海人明工部主事長世子由孝廉任
廣信推官稱賢能嘗以金三千分贈貧交之不克葬其
親者宦橐蕭然日與曹垂璫張錫懌諸人以詩詞倡酬
壻王顥有文名

上海志

吳欽章字含文華亭人前明崇禎舉人父嘉允殉節金
陵欽章扶柩渡江中夜風雨大作鄰船覆溺欽章所乘

舟飄至一洲獲免人謂孝感所致少有經濟才山左李
侯復興知婁縣建議均田均役欽章佐其成後復興卒
於官欽章經紀其喪年八十二卒鄉人私謚貞定先生
附白龍潭李公祠

婁志

錢世貴字聖旂華亭人居高橋前明崇禎進士知諸暨
縣有政聲改國子監博士入

國朝杜門不出先是竝海竈戶人給柴蕩二畝半不取其
稅唯納丁銀若干其後海灘漸廣向時一二畝者多至
數十百畝墾爲良田皆蒙柴蕩之名而不入縣籍無賦
稅竈戶稍長不一上者買柴蕩數千畝最下者無立錐

然丁銀則視舊籍無所增減貧人或逃竄遠去丁課不登康熙中世貴言於巡按馮某計田起科以當丁銀於是民無逃亡丁無補課各場便之前明稅政遂絕子愷諸生有名吳騏爲之立傳

吳騏集

陸慶臻字集生青浦人文定曾孫前明崇禎舉人有聲幾社中入

國朝以詩文雄長東南家貧兩親未葬嘗泣然曰吾安得一笏之田以安吾親體魄乎萊陽宋琬爲賦笏田行學者稱爲笏田先生時陸氏多才慶衍慶滋慶紹慶源慶恆慶裕慶曾其尤著者以慶臻爲最

青浦志參安雅堂詩文集

林希顥字式齋華亭人明貢生博學敦行前明庚午姚文襄典試北闈欲得希顥爲首希顥遂不與試機山相國被逮或謂其與東江有私憾殺之以其事餽希顥希顥正言拒之相國文震孟聞之曰可謂君子矣生平於學無所不究手錄經史要略朝章典故又復殫稽天地以及星緯樂律著書五百餘篇晚經世變靜默自守嘗以理數推擇日辰鑄鏡一圓落漁人手質錢於張澤市中市人置諸室暮夜有光意中有寶槌而碎之則皆水也張憲副安茂至一寺見懸鏡光彩奪目詢之曰此希顥所鑄每日鏡必有聲人始服其學順治八年卒門人

私諡貞文先生

魯志

王元一字默公華亭人明諸生少與杜麟徵師事張宗伯鼐爲入室弟子素履恢奇古文詞稱作者陳黃門子龍出其門王申文選之刻與宋存標共事郡人古學復

興蓋由元一云

社事本末

宋存標字子建華亭人堯武孫明崇禎十五年副貢注選翰林孔目甲申後隱居東田嘗作西北祠以祀列代忠烈生平以揚乾風雅爲事刻幾社古文爲王申文選者有棣萼新詞國策本論十六卷子思玉字楚鴻思宏字漢鷺竝聰穎絕人以諸生終

奉賢志參松江詩鈔

張密字子退華亭人明貢生官兵部司務以兄寬偕陳
子龍殉節遂終身棲隱後游滇中送徐闇公子孝先扶
觀歸里生平著述今散佚不存

雲間詩鈔

邵梅芬字景悅青浦人工詩初受知於知府方岳貢爲
諸生時與張宮王澐同受業於陳大樽之門詩益進順
治二年卒夏存古有詩哭之著有青門集

青浦志

王廷宰字鹿柴華亭人嘉興籍貢生官六安教諭遷沅
江令福王立嘗一至金陵見時事不可爲卽歸後隱居

張堰自號毘翁著有畫鏡及緯蕭齋集

明詩綜

孫逸字中麓青浦人讀書不求仕進喜爲詩順治庚子

卒繆侍講彤表其墓曰青溪有隱君子其志立而正言確而厲其書無所不讀而風致豪爽望若神仙子朝字元賓明諸生先逸卒包爾庚嘗序其集亦博洽好古者

蕭中素名詩以字行又號芷崖華亭人工詩文善書畫精音律隱於匠嘗曰吾匠氏也衣食足以自給詩酒足以自娛絲竹丹青足以悅耳目高賢良友不遠千里而至人生之樂莫踰於此矣達官長者投以篇什俱不報蓋呂微之朱百年之流著有釋柯集南村詩稿

通志參金谿峴

南集

王應騏字允錫華亭人父嗣響前有傳應騏前明天啓
甲子武舉工詩入

國朝遁迹亭林寶雲寺嘗以紗幘首用瓦罐煮食人多稱
爲紗裏頭老人晚年與蕭芷崖談詩相得芷崖詩以懷
之有一褐常露肘十年常病醒之句康熙丙辰卒

松江詩鈔

盛國芳字香樾華亭人明諸生甲申正月入京獻策言
殄寇事不報遇變南歸隱於農圃曾倣宋時王鳴漸野

菜譜作老圃志

松江詩鈔

王景曦字子萬上海人於餘姚王氏爲疏族以勳戚子
姪就錦衣衛試中崇禎十五年武舉選左所千戶時疆

園日蹙請墾海中大瞿山爲屯田與御史時敏偕會明
亡事罷奉母終其身子貞儒諸生弟某字子實母病割
乳旁肉療之早卒

上海志

顧在觀字觀生華亭人明諸生博覽經史陳繼儒見其
史選曰神明識量不可及也因推鳳凰山來儀堂以居
之時楊文聰爲府學教授命子師事焉後馬士英辟置
幕府嘗以近昵懷寧羣情致憾語士英及士英輔政方
欲起用老成而大鍼欲以一網盡之在觀又語士英曰
如大鍼之才智加以十七年傷心次骨之怨使其一旦
得志爲所欲爲必不顧其後此事關公門戶亦千萬世

前議所繫且以告士英子鑒鑒幾諫至涕泣隨之其時
不至起同文黨錮之禍者在觀力也後知事不可爲卽
告歸硤田二頃力耕自給以逋賦失產窮死

春融堂集

趙洞字希遠華亭人明諸生博學能文董其昌王時敏
皆折節下之福王時楊文驄作書招洞洞曰國事危如
累卵而君相亦姑爲樂此亡徵也作書謝之晚年以書
畫自娛移居梅花源與沈求爲友絕意進取著有盟鷗
惺園諸稿及題畫錄

青浦志

倪允中字端甫青浦人幼穎異讀書通大義旣長有膂
力能兩手各握五百斤物行數百步里中惡少年憚之

性孝棄儒習賈累致千金奉父母任俠輕財與蔡長爲
莫逆交乙酉城守允中與長督所部巷戰突圍出東門
長遂下海招允中往允中歎曰吾力竭矣吾有二老在
未敢遽以身殉也遂不行隱居浦之斜涇幅巾方袍教
授生徒以終

陳鼎留
溪外傳

李延昆字辰山上海人居所城初名彥貞字我生大理
評事中立子也師事同郡舉人徐孚遠爲高第弟子嘗
從孚遠入浙閩後隱於醫居平湖祐聖觀中爲道士其
卒也以書籍二千五百卷贈秀水朱彝尊彝尊爲志其
墓敘次詳盡著有放鷗齋集南吳舊話錄

南匯志參
明詩錄

張在宥字虎侯上海人明諸生國變後嘗浮海入閩仕
唐王於福州復事魯藩爲中書舍人

大兵破舟山在宥以前一日奉使普陀遂得歸居舟山時

著有雜記數冊今不存

曝書亭集

顧章甫字魯斐上海人允貞子明貢生授邑丞見天下
多故不欲進取以造就後學敦厲風教爲己任史可法
薦入國子監固辭順治初

詔舉山林隱逸省臣檄府徵聘不起時推東南隱士之冠

松江詩鈔

張彥之字挑侯華亭人初名慤之象元孫幼與弟漢度

九荀有三張之目讀書細林山中後盡斥田宅卽細林別業亦讓其弟隱居窮巷取遺書讀之託於酒狂以自

廢著有浴日樓詩稿

松江詩鈔

董黃字律始號得仲華亭人隱居不仕著白谷山人集陳維崧序其集云託泉石以終身殉煙霞而不返可以得其彷彿焉

松江詩鈔

沈求字與可上海人諸生乙酉後隱居梅花源以詩文自娛年七十五卒私諡貞愍先生著有箴言杜詩肆考梅花集句子白字賁園號云備子卽父所居築結繩書屋懸父像於中晨起必拜飲食必祝終身如一日善山

水從橫疏快有別趣詩與書亦揮灑自如年七十八卒

著有樗亭稿嘉定張雲章銘其藏曰孰膠其口孰韜其

光兩世之隱百世之芳

青浦詩傳
參上海志

莫秉清字紫仙華亭人中江曾孫明諸生亂後遷居海

上幅巾道服絕意進取當事欲見之辭勿許著有采隱

集書學晉人得其家法

通志

蔣平階字大鴻明諸生年十八從陳黃門游詩文日益

有名性豪雋有古義俠風晚業堪輿精其術今言三元

法者皆宗平階

婁志

沈楫字宏濟華亭人明學士度之後弱冠補諸生經明

行修夏允彝命子完淳師事之中年屏居湖橋角家日
困乃北游燕齊名公卿咸敬禮之晚歸故里年已耄日
書千字文易錢千文爲薪水資

妻志

計南陽字子山華亭人明諸生天才俊逸工詩善書少
以文贄何職方剛剛驚異呼爲小友又謁夏考功允彝
允彝命子完淳師事之時完淳卓負才名而子山抗顏
督課不少假國變後棄諸生放浪山水閒爲詩益悲歌
慷慨既出游爲諸侯賓客然高曠不慕榮利麻司馬總
督兩江招致甚相得及歸而麻思之竟不可復召也省
中嘗薦海內名士十人擬子山第一子山手裂其稿聲

已俱馮沈文恪施清惠相顧愕眙謂不意剛介乃爾至
汪孝友三娶皆無子客游所得皆散之親友視甥姪如
子既卒甥姪爲執子喪而葬之

吳興集

王光承字玠右華亭人弱冠補上海諸生力學好古博
綜羣書自陳夏倡立幾社光承兄弟又分爲求社遂駸
駸有竝立之勢焉福王時貢入太學上江南時務五策
不用隨父之官新昌屬魯王監國徵書屢下上書力辭
浙東潰父子徒跣萬山中未幾天下大定與弟烈隱石
筍里力耕養父不入城市者三十年無子一女適中書
楊瞻年七十二卒著鎌山堂集烈字名世明金山衛學

生先光承卒有錄山堂別集女名雙鳳有玉榮草

通志參明

葉

金是瀛字天石華亭人居高橋里明諸生任俠有節槩
甲申乙酉遠近村落集兵自固因劫略相讎殺高橋推
是瀛主兵安堵如故松江兵起以指揮常駒爲參將材
官蔡長爲游擊守郡城城破駒與長投是瀛是瀛俱送
之入閩事平名捕是瀛鞠之以辨得脫初是瀛以詩謁
陳黃門黃門嘉之惜其入元自後乃盡焚少作以蒼老
平淡爲宗嘗北游燕齊歸里後與王光承兄弟吳騏結
東臯詩社著有蓬山集八卷弟是崑字黃石詩一卷王

元承序之

奉賢志

吳祺字日干華亭人居望湖涇明諸生有盛名與同縣王光承兄弟交以名節相砥礪家徒四壁取與不苟留客一飯卽與妻食粥一日以補之其苦節如此鼎革後棄諸生服遁迹山中光承稱其堅苦自守三旬九食五月披裘侮之不怒周之不受古稱石隱庶幾無愧爲詩一往而深不拘一格光承稱其悲憂慷慨百感積中而詩益工變者爲龍雄者爲虎華者爲鸞高者爲鶴著有願領集八卷

奉賢志

吳懋謙字六益華亭人名醫中秀子中秀字端所家淨

土橋與董宗伯陳徵君游乙酉年八十餘被難懋謙負
尸趨北郭洗血葬之廬墓三年棲遲養德康熙間海寓
平定風雅道興乃提琴負書浪游荆豫齊晉嶺南薊北
閒所至與名公鉅卿交人以七子中謝茂秦方之又與
北地申鳧盟齊名有南吳北申之號晚歸郡城築獨樹
園於京郊與白燕庵鄰自稱獨樹老夫家年七十三卒
門人私諡貞碩先生有華萃初集苧庵二集及豫章虔

州諸稿

松江詩鈔

韓范字友一華亭人明諸生工制藝尤長於詩嘗與閔
山紆遜刻東華集後與王玠右兄弟金天石吳日千何

次張吳懋謙聯詩社稱雲閒七子著雲頌堂詩集玠石
序之稱其學問性情意氣蓋學問以博聞強識言性情
以仁孝忠愛言意氣則以朋友族黨死生患難之交言
謂此皆無與於詩而詩之工以此又著左傳測要謂是
談兵之書而因推測其事迹非徒在文義字句閒也惜
其書已不存

鍊山堂集
參奉賢志

何安世字次張華亭人明諸生河東副使萬化子也潛
修著述詩律尤擅著有晚蘭堂集

奉賢志

盧元昌字文子華亭人居東郊明諸生初在社中與王
廣心顧大申齊名操選政風行遠近入

國朝坐逋賦削籍以著述老於鄉孫畏盈字廣涵雍正己

酉舉人

華亭志參松南清氣集

陸起城字宗維上海人明揚子諸生爲文務崇實理自成一家言嘗病俗儒馳騁不軌於正因作西林闢釋者說羣害說富前明版蕩之秋目擊時艱作求賢弭黨諸策念切桑梓有捆束均役水利三答問所言皆有關於世道人心又校定先世各集網羅前言往行勒成家傳一編從孫景淳字師古亦以文名

陸氏家傳

沈麟字友聖華亭人父埤仙著編年考其書自初生以至百歲凡歷代名人事迹可考者皆隨年紀之頗極淹

薄隣道風秀世才高遇窮其初躬耕松江之濱淒風苦
雨屏絕人事後復杖策遠游梯山登谷其詩益豪夫人
彭少君燕又先生女也工吟詠有鹿門倡和集王庭贈
以詩曰名尊高士傳樂詠少君詩又嘗入都與顧待御
如華交最善待御卒於楚不遠千里奔赴其喪其篤於
友誼又如此

南窗文略參
方景高筆記

唐醇字復西華亭人明諸生有聲幾社後改名景真不
復應試幅巾布袍屏居一室同時有他唐名鉉字玉汝
弟銘字歐冶竝有聲幾社鼎革後皆以布衣終著有馬
蹟堂稿鉉與銘詩失傳

馮鼎位字素人婁縣人時可孫前明諸生豫纂修貢入太學授翰林院待詔馮氏自南江先生而後子姓蕃衍貧富不一鼎位緩急周全惟力是視處心行己不愧世德甲申後屏居鄉曲水竹自娛與諸名流往還過從及僧寮鶴觀怡情寄志焉順治十五年卒從弟鼎學字習甫嘗從山陰劉念臺先生講學父沒廬墓三年墓產靈芝二本同社陳民表作瑞芝詩順治中巡按任濬與學使某交旌孝行子灋精星緯象數之學著述尤多

魯志

周維熊字開武華亭人諸生遭明季喪亂遂無宦情隱於酒自號酒人繪酌酒圖以見志董得仲題曰谷口逃

名絕往來青松白石擁高臺酒場舊侶知無幾日向尊
前獨舉杯有手批通鑑於忠佞分塗不少寬假

陳謨字遜欽青浦人甲申後鍵戶讀書或勸以進取輒
謝曰國破家亡我安適歸自邑中移居北亭鄉之小岑
溪終身不入城府張誠庵題其所居云地僻真難到人

高豈易逢蓋紀實也

青浦詩傳

曹谿字鈴仙華亭人居干谿明嘉善諸生幼有才子之
目事親色養力周貧族持己甚嚴惡聞人過嘗曰小人
不可與作緣亦不可與結怨後棄諸生與從兄戮雪創
小蘭亭詩社著有谷音花嘯集

袁餘字介人華亭人居蕭塘明諸生著有雪皋草堂集
王光承稱其閉門鍵戶風雅自娛日吟數章以當薇蕨
先是同里宋徵輿作於陵孟公傳宋與陳雖舊交而取
舍異路辭多失實介人爲文以較之尤可見其能持公

論

松江詩鈔

施世則字仲倫青浦人明諸生甲申後放情詩酒自號
山樵子居七寶鎮坐臥一小閣擁書千卷時浮大白著

酡顏閣集

青浦志

陳曼字長倩上海人居川沙明諸生有聲幾社甲申後
林閑寂處畫宗二米性好潔有倪高士之風

夏治字再我婁縣人居千巷諸生與同里蔣漁山善焚
儒衣冠偕隱其學邃於古尤長於詩時人爲之語曰漁
山肅肅如寒風振松再我凜凜如霜臺籠日

松江詩鈔

曹棻字叔芳華亭人世居東千里荊州通守蕃子蕃挂
冠後承意色養不復應試當湖陸清獻其外孫也清獻
幼時每撫之膝上曰此兒舉止不凡異日必成國器人

服其有識

金山志

周楨字香巖華亭人有問難俚言稿以順治丁亥五月
行遁至武林集慶寺與省南玉衡兩上人游故云問難
也後歸里以訓蒙終

松江府志

卷五十六

三

朱履升字貞階華亭人義士陞八世孫明諸生其告家廟文云乙酉春予春秋三十有三卽解青襟而服黛帔云云後以貧困終著有樵隱蘧廬二稿詩江翁歷字紀長華亭人諸生有聲幾社中

國初爲沈猶龍居守力詘走當湖與沈季友爲忘年交詩筒酒盞殆無虛日文有逸氣詩尊唐闢宋其在東湖以詩學授借山和尚亦以見賢者所居流風廣布僕某當歷亡命時爲葬其父母見盧文子集平湖志引龔志惜字宛楞華亭人明諸生崇禎末嘗草救時疏欲入京獻之其兄慮賈禍以母命止之展策輒流涕遂不

應試或勸其浮沈諸生中可免踐更累不聽卒以徭役
廢產浦南劇盜橫行其魁相戒曰龔高士家勿犯也晚
逃於禪種頭陀草一盃動必自隨一旦忽枯死歎曰吾
其瘁乎病數日而沒其子震亦奇士游京師與尙書龔
鼎孳遇接談甚久後尙書謂鄉人姜于達曰龔生才甚
佳盍來一敘松江詩鈔姜以語震震泣然曰此非先人志也
卒不往人以止高之詩鈔

金瓊階字德宏華亭人自稱終去逸叟其先本鳳陽人
始祖黑兒明初以戰功賜爵世襲金山衛千戶故金氏
遂爲郡人瓊階生有至性甲申後居東郊北俞塘好鼓

琴兼蒔花藥知府某聞瓊階有盆樹使人持金買之瓊
階延使者入爲沽酒徧酌諸盆盎長揖刺刺作惜別語
旣而盡毀其樹石使駭怒去而瓊階自若也聞其琴學
得異人授孤憤淒怨聞者莫測其意得其傳者爲袁子
彝沈維存王汝德瓊階嘗評三人琴袁曰市沈曰天王
曰隱後袁以其藝游公卿間名甚著沈則蚤喪王傳於
其子端端死而瓊階之學無傳矣瓊階年八十餘卒汝
德字成鄰端字師呂

吳騏集

陸景俊字爾明青浦人明諸生矜尙氣誼不以盛衰改
節甥李待問殉難冒險入城得其棺以出知福寧州徐

丙晉亦其甥也遠宦歸寄迹神山及沒貧無以斂往臨其喪卽爲營葬從子虔曾謫戍瀋陽護其家累出關所著有辨亡論駿石塘議陸氏世譜藏於家

范彤弧字樹鏃上海人初爲周勒卣門人勒卣卒彤弧心喪至於廢食後浪游不仕從范文肅文程游嘗至瀋

陽著有繡江集

松江詩鈔

王廓字遙集華亭人嗣響仲孫郡庠生七齡通四子書毛鄭詩解比長綜貫載籍潛心理學不求仕進所著大要以紫陽爲宗卒贈光祿大夫祀鄉賢祠

華亭志

胡元諒字鳳山華亭人居松隱周卹鄉黨恆無虛日弱

冠有聲藝林崇禎末卽棄舉業放浪煙波葭葦間以釣艇自隨後邑令李端和舉賓飲不赴卒年八十九

張淇字爾瞻婁縣人自上海移居包家橋父尙文敦義行好施予淇承先志置義田千畝以贍族人子彙復仿范莊規條經畫甚具孫照聞於

朝請著之官牘以垂永久

上嘉其好義特以其子集官追授吏部左侍郎

婁志

孫雲鵬字扶雲青浦人諸生少能詩及長南游越北至京寓青州入西安登太行由中州上嵩少探奇攬勝一寓諸詩又能畫侯宏曹爾堪施閏章柴紹炳皆與論文

而沈荃受業門下最久吳懋謙定其詩同時王璐字爾公由吳縣洞庭遷居珠家角爲縣學生亦以能詩聞有

東皋詩草

青浦志

陳磨字機來青浦人父功邑名士磨才氣卓越能爲詩古文書畫兼長尤敦友誼以諸生高等入南闈輒報罷病憤死其前有許岳允字文伯瞿一漢字貞子曹鳳苞字授章皆以高才生不遇鬱鬱而沒

青浦志

范箴字莘尹上海人明方郎中景文孫穎敏美風儀十餘歲卽餽於庠諸生中推爲才雋七入棘闈數奇不售益肆力於經史學日淹博赴京師與臺館諸公互相

酬倡有達之

容賞者倪永清嘗刻其古今體詩數十首行世稱爲陳大

樽後一人

遜志齋
隨筆

李之駒字昂若華亭人明諸生讀陽明書潛心窮理與
王玠右兄弟相友善當事聞其名恆式其間山陰魯謙
庵總督靳文襄竝以禮羅之謝弗往先是父令收責於
鄉一一爲合券有不能償者卽取券焚之父聞之欣然
歎其志趣不凡著有四耕齋文集

奉賢
志

方世求字在莘華亭人居金匯塘正學十二世孫讀書
敦行爲諸生與李之駒講明理學詩文爲王玠右吳日

千諸人所稱康熙二十二年具呈知府魯超興復郡城
求忠書院揭虔告祭終始賴其力客授濟寧請於當事
祀正學父克勤於名宦祠中表章前烈人爭重之康熙
戊寅卒於彭城道署著有願學堂詩文集並雜著若干
卷子景高自有傳

顧用楫字蔚若上海人明諸生博聞強記有聲幾社與
李僉事懷及陽曹魯元交入

國朝後李視學中州招往襄校後館張溪王氏文恭項齡
及二弟皆出其門著有還素堂集

南匯志

曹重字十經華亭人初名爾陔以父諸生烺乙酉遇害

遂棄舉子業生平博學工詩善繪事尤長於詞著濯錦
詞十卷弟竣字上衡亦不求聞達著有無聊吟聽嚶軒

稿

松江
詩鈔

孔蘅字崖秋華亭人明諸生寄情邱壑吳騏贈以詩云
不羨應劉貴惟知沮溺賢家臨滄海曲身寄豆苗田其
風節可想

松江
詩鈔

何澗字一簾原名汝閭華亭人明諸生工詩文曾爲張
肯堂記室肯堂謂之曰我在此義不可辭子無民社責
且有老母可以去矣乃歸棄舉業改今名授徒養母子
壽世讀書不應舉以九章法得貲以供甘旨親沒喪祭

誠敬六十年如一日云

王大綬字聖佩上海人居鶴沙早負才諳尤工吟詠後棄舉業閉戶著書有寫心集二卷吳騏序之稱其原本忠孝抒寫性情允爲東臯隱君子云

松江詩鈔

張三秀字晚史青浦人著醉墨堂集宋克岐云晚史雲閒高士少瞻學後博極羣書而詩尤高古

松江詩鈔

董而中字霞篆華亭人文敏族孫諸生贅居洛北村因家焉畋漁經史放筆爲文浩瀚莫禦詩亦脫落凡近出入香山玉局閒楊閣學瑄幼嘗師事之所著詩賦雜文

三百餘卷

金山志

李价瑩字存素上海人諸生少孤有至性訓蒙養母淹貫經史恂恂自飭不以賢知先人嘗論狂狷鄉愿曰狂得聖人之神狷得聖人之骨鄉愿得聖人之皮毛識者謂其體會親切子恆歲貢句容訓導

南匯志

申浦字自然華亭人居無定所嘗棲野店僧寮匡牀布被之外無長物平生善哭以畫知名於時

黃中理上海人雅尚高曠居貧器用多以匏自號九匏道人工畫水墨牡丹年八十餘卒同縣葉正源字星槎亦以高隱稱門人私謚貞介先生

南匯志

陶獨無名字金山衛城凝霞門外人明末其親死於兵

遂不娶絕葷酒樵采之餘輒借書把誦曉地理好吟詠
常被草衣以青布裹其額人咸謂之獨云後營葬其親
於凝霞門外月牙池上訖隨遁去不知所終

松江詩鈔

沈浩然字雪峯華亭人本名明初字東生忠烈猶龍之
子也少爲名諸生能書善射廕錦衣衛千戶乙酉猶龍
殉節遁居海上復依故人黃斌卿於舟山斌卿爲阮進
所殺適魯藩至署爲侍從辛卯昌國破遂削髮爲僧歸
吳改今名晚居善應禪院年五十一卒著有雪峯詩稿

通志

謝球孫字稚荆華亭人家素封性好義明季曾建斜塘

兩橋諸先達皆爲折節後郡守李日華舉行鄉飲延爲
介賓球孫抗聲曰二十年老寡婦何必定要我嫁設我
與鄉飲何以見諸先生於地下卽日薙髮爲僧

王侯字簡公華亭人居衛城明諸生貧而好學事事取
法古人好談忠孝大節以闡幽顯微爲己任隱居不仕

詩文集多散佚存雜記一卷

徐盤跋語

陸從龍字五雲華亭人弱冠爲諸生試輒高等父秉道
以隱德聞於鄉家故貧從龍力耕硯田以供甘旨父疾
躬侍湯藥衣不解帶者三載父沒事祖母居氏竭誠奉
養垂十五年毫不以忤諸叔撫幼弟尤極友愛弟亡三

子並在署龍恩育教誨俾至成立妹少而寡撫養終其身叔怡溪夫婦與其子相繼疫死親黨戒勿近從龍徒跣雨雪中力營後事凡百日舉四喪有季叔某聽讒搆難後某爲怨家所陷拘於官從龍爲匍匐以請宰曰此非昔之構子於難者乎子何請焉從龍曰藏怒宿怨於弟且不可況叔父乎宰義之事遂得釋生平好施予急人之難嘗有故人死貧不能具槥殯從龍倡義殯之且收恤其子其交友敦古道類如此從龍學術醇正言動不苟一以聖賢爲法居鄉教授及門數百人爲名諸生及成進士者不一而足爲文力追先正詩詞雋逸出塵

兼工行草書年六十五卒門人私謚曰怡靖先生子祖

修自有傳

魯志

陳夢梅字商羹華亭人工經生業爲諸生有名庚午乙酉兩中副榜甲午恩選入試授知縣以父老恐遠任願改教職後爲高郵州學正執經問難者滿帳下考功孫宗彝命其子受業焉學使簡上按部索諸生行劣狀堅執不應曰秦郵水災生等鳩形四散豈能飛而食人又使之誤羅法網乎學使高其義允之蒞任三載乞老致仕奉

俞旨肅衣冠辭

廟知州莊振徽歎其高節爲近時罕見

注至孝孺慕之愛至老不衰待弟姪有恩四世同居年

八十三卒子颺孫翼鄰皆清修能文

魯志

李思貞字怡慎華亭人性醇樸里有欲逞志於其宗者
詞連其父其父急往郡城母命鬻田往供費用戴星而
行拾一遺緘解之則銀五封及網巾寸餘頂念曰此必
貿易苦積之者豈可幸得而濱人於危哉坐守良久見
一人往返尋覓頓足而號問之曰余浙人以網巾爲業
去家十年積銀五十兩欲爲終老計頃如廁失去因欲
死驗其實舉還之遂行暨見父則事已解遂歸自是家
漸起二子相繼入庠以壽終孫扶雲康熙丙辰歲貢

魯志

王涓字靖公襄縣人陞孫少孤母兄相依兄日藻雖貴未嘗有介弟習康熙乙卯由監貢授知縣丙辰入都會邀新例加授兵馬司正指揮諸卿大夫延接商榷經濟侃侃籌畫靡不欽服勸留補職不應及歸好行其德凡救荒賑卹諸務出貲襄助有祖同年之子貧而瞽給以衣粟月必遣付其家聞戍兵北還溫台閒婦女流離甚衆出數百金命僕至金陵贖還其夫有士子五人同其妻至松踵門謝者更資遣之至於贖鬻妻還身券代輸逋賦不可勝計卒之日赴哭不知姓名者接踵而至焉子二楨以歲貢授內閣中書後進士廷機由內閣中

陸職方司主事

魯志

王允鏐字劍如華亭人爲道舍人中年無子忽自悔失身棄而歸力爲善事凡鰥寡孤獨疾痛死喪所全濟者不可勝計康熙乙卯丙辰閒溫台山寇竊發官兵捕剿被略難婦以千計武林義士郭某尙某等傾家貲贖以畀其家允鏐在武林亟歸棄產及稱貸數百金又與孝廉張喆貢生吳三省高懿懋等募諸同志凡得千餘金齋之武林所贖甚衆浙中諸憲臺進而禮之丁巳聞難婦之在松郡諸營中者七十餘人皆訪求得實獨出己貲顧於上臺諸營亦爲感動一一皆完聚如故撫軍慕

亦進而禮之於是允鏐善士之聲日著所居在城東顧連無告者踵門無虛日允鏐名田不過五頃而才足以副其心既舉子欣欣自喜不以爲煩又屬有天幸當水旱其田獨收辛酉以耕耘在鄉鄉閒多疫獨其所居村無恙鄰村之病者有鬼憑焉曰我輩謹避王善人允鏐益自信爲善愈力其卒也鄉人之善者悲之

魯志

張國祚華亭人家貧刻志拮据孝養父母其父每以未克葬親爲念卽竭力營辦以安其心母病劇掬穢私嘗卜其休咎及兩親亡後哀痛不渝復瘞像侍奉無異生前里黨陸紹閔等共舉其孝行康熙十四年六月署府

事通判孟憲孔給額旌之曰篤孝可風

魯志

徐冕字表聖華亭人幼孤率母顧氏教惟謹稍長奮志力學誠恪端嚴守顏子四勿之戒鼎革後奉母鄉居不微榮利嘗館唐氏家寇至避稍後見執問主人所在舉刃加頸卒不言寇感曰義士也舍之出謂衆曰我觀寇雖衆而囂外訐而內怯噪而逐之走矣果如所料唐氏家獲全家貧與弟晟篤友愛所積館穀爲之聘娶平生周急濟人不遺餘力能古文詞善隸書喜古名畫法書真贋立辨母終哀毀弟晟又沒痛悼竟不起臨卒囑三子曰我一生謹厚無一事不可對天日者每見世閒鏗

薄殘忍之徒必遭陰譴子孫零替戒之哉年五十二所著見藝文中長子賓康熙二十七年進士次宇次宣皆

邑庠生

魯志

沈原宗字慰宇華亭人父業儒有祖遺逋數百金積憂日嘗原宗童年能體父憂卽棄書貿易生計日廣遺逋畢償父沒營葬然後自娶父生四女及二弟原宗殫力婚嫁遭母喪哀毀茹齋者三年多營善事姊妹四人皆早寡原宗迎恤有加視甥猶子兩娶不育以弟長子兆龍爲嗣生平好善樂施知縣王協題額曰忠厚存心兆龍事母尤孝郡博楊才瑰稱爲孝德紹衣云

魯志

王昌紀字永侯上海人諸生圻孫孝友純誠續言勵行
圻博綜羣籍而昌紀復手輯藏書萬餘卷蠅頭細書至
老不衰撫梅蔣竹以訓其子中西以後足迹未嘗一入
減市也年八十六而卒所著讀史掄珠十卷閱古掄珠
十二卷類海一百卷增補甲子會紀一卷易經大全注
疏合參二十卷詩經大全注疏合參三十卷俱藏於家

魯志

王日旭字東自上海人諸生父觀光前寧波通判忼慨
好施順治初以華亭陳子龍獄詞逮繫江寧日旭草行
露宿號慟乞食求進獄中不離奉侍會省釋負父歸孝

養終老孫大經字理緒孝侍節母有義行

上海志

張勃字伯涵上海人孝友方介博洽經史適土寇作亂
勃父年九十餘臥不能起寇至欲殺之勃以身捍父宛
轉白刃閒賊感其孝獲免先是董象恆開府兩浙延禮
之所著政績勃贊畫居多子天臣亦知名

上海志

席本久字仲遠青浦人歲貢生與太倉張采吳江徐汧
同郡陳子龍夏允彝周旋劇切一以道義爲歸居喪哀
毀骨立麻衣蔬食大年又賑飢收族立祠堂設義塾惠
戚黨賙貧交捐葺學舍修治陂塘救生置朽行之終身
晚輯朱子近思錄及張無垢鄒南皋李龍湖會語諸書

年八十卒

清浦志

馬是騏字孟損華亭人善屬文明亡棄舉子業爲詩文與王玠右唐虞逸諸人結詩社倡和德誼文章爲一鄉師表地方有大興建當事咸咨之如築滌闕石塘開運河俱有議略舉鄉飲賓著有蒹葭草堂詩集年八十六終子昌禧昌言能世其學昌言字舜俞至性純篤親沒後哀思至老不忘工詩有對碧軒詩集六卷年七十三卒

唐侯興字公武華亭人仲言孫崇禎閒其婦翁黃茂宏以儒士選福州府檢校侯興往省之距福州百餘里於

旅舍中燈下在牀頭得一篋啓視之皆金珠也侯興知必往來者所遺託病留二日以待之竟不至因問寓主人前夕宿此者爲何如人曰有男婦數人不省其何事道此侯興謂曰三四日閒或來覓所遺汝第令其至福州檢校署中我候之於彼遂去至茂宏所越三日其人果來叩其金珠之數與形狀皆合遂舉以畀之泣謝而去

魯志

張起鵬字湯問金山衛人世襲千戶至起鵬始習文爲華庠生己酉

大兵南下起鵬奉母出城避兵復入城侍父城破父時傑

弟起宿俱巷戰死潛覓父尸斂而匿之又求弟尸不得
遇次弟森負重傷出之積骸中扶歸藏護事平營葬以
田廬之半與森而已則館於秦山孫氏明年吳聖兆獄
起將及孫起鵬挺身冒險力辨其誣遂得昭雪其他卹
孤寡瞻親族事多類此年七十餘卒

馬晟字景良婁縣人諸生循例授訓導嘗以田宅授兄
後晟卒子在繼祿兄爲撫之成立里黨交稱之同時錢

繼善亦以撫姪有恩誼聞

妻志

吳中毅字遠公上海人居周浦嘗析己產以分兄弟同
里程亦宜聘連氏年四十餘貧不能娶助完其婚卹三

將鬻其妻哭別亦贈以金俾勿鬻友人馮方奕以田售
一百五十金念其貧出券還之崇祀鄉賢同邑姚繼禮
字君和好義急公三黨賴以舉火順治閒出米五百餘
石煮粥濟荒人頌德焉

南匯志

何遠字履芳婁縣人性誠慤有志行工山水以其藝知
名於時母曹氏病劇遠割右股爲羹以進中書李雯有
何孝子詩紀其事後汪成章性亦至孝父孝祥病割股
和藥以進漸瘥母趙氏患瘡且甚恐其復殘肢體誠家
人匿剪刀成章潛竊翦翦左股血溢痛絕然母病賴以
愈閱年餘卒又范安鼎字以方宋文正公二十世孫父

病割股和羹以進父愈越二十年安泉姪君樂亦以割

股聞

婁志

蔡象春字震陽青浦人性孝友父亡適比鄰火焚偏父
柩象春自蹈火救出有貧不能葬者讓地以埋之受人
寄財不忘久要舉鄉飲賓又義士張畦夏璣張嗣張溪
唐琛吳鼎吳文英沈謙諸真孫徐壽曹慈朱萬邦陳區
諸臣蔡倫李樹德諸懋敏方正范蔡簡蔡宣程大任等
及鄉飲張仲仙何鑒曹慧潘寔潘可賢黃崇道潘可教
王佐沈大章張延年李世允潘廷揚陳一德趙尙忠諸
慎胡交文任文燦胡方啓施元亮吳紹夔瞿一淳潘衷

賜胡先錫蔡天槎吳欽章任文炳葉正陽吳迺共四十
九人皆以孝友著於時

青浦志

王明智字伯超上海人居航頭鎮淳樸無他能人謂其
多陰德有子五孫二十四曾元羅列五代一堂邑令史
彩額其堂曰耆壽年八十四卒

南匯志

松江府志卷五十六終